

議以仁若監司長吏及佐史有勞者晉秩賜金各有差梅君立石於堤使行爲記竊惟國家建都燕薊因元人故道漕於齊魯之郊導汶泗諸泉分流濟運北通御漳兩岸彝衍無所敗壞而南流通淮者與河相值自張秋決塞河益遷徙數迫病渠卽幸無河菑而鄒滕諸山之泉流爲通川互相權輸湛於呂孟周回可數十里曹單金城諸邑河濟故道滙爲瀟澤雨水猥盛相挾而東湛於昭陽周回可數十里皆以一渠受之隄隄汜溢其勢然矣嘉靖乙丑飛雲之決朱大司空始於昭陽湖東開夏鎮新渠以漕而隄於湖之西岸禦河水出之秦溝至茶城乃與漕會漕渠自留城以下挿梁疏闊遊波稍緩有所休息三十年來漕無急也萬曆己丑河溢茶城反灌漕渠舟膠不進乃徙運道於南改建內華三牐伏秋雨發河水噴至閉而不內保渠如城利在自守非弗稱便矣然泉湖積水南北灌注而以一葦之渠左提右挈峽其湍悍之流至於三牐爲河所距又不得出欲隄防毋壞而地母爲壑胡可得也潘大司空嘗欲爲石隄障之度不能成乃穿呂公堂至鎮口爲渠以避湖水及其潰溢